

## 《戀歌》台語詩集作品選錄／陳胤

### 之一 春雪

是真遠真遠 ê 一條路  
是你 ê 目神金金無怨妒  
是春天 ê 雨絲愈拉愈長  
抑是阮 ê 傷悲 kap 躊躇.....

春天那會 teh 落雪咧？  
堅凍 ê 愛情  
Kám 有法度變作一粒日頭  
Koh 對島嶼上 kuân ê 山頂爬起來？

阮猶原 teh 等  
等你 hit 年行過阮性命 ê 春風  
將冬天樹 ue 最後一片焦葉  
吹落

葉 落 夢 土.....

啊！思念  
是鑽 tī 阮心內 hit 條  
上遠上遠 ê 路

#### 註解：

kám 有：『有嗎？』

位 (uì)：『從』。

上 kuân：懸，『最高』。

樹 ue：『樹枝』。

### 之二 批

九降風 koh 來矣  
一陣水鴨像舊年 kāng 款  
對天頂飛過.....  
雲，逐遍攏感動 kah 強 beh 流目屎

—— 其實，he 是阮寫 hōo 你 ê 批

稍寡仔 濛濛仔雨矣.....

阮嘛照約束 牽著你 ê 手  
Tī 海邊 散步

你手底 ê 溫暖 hōo 阮知影你  
已經偷偷仔 kā 秋天講  
阮 ê 批，收著矣.....

**註解：**

he：『那』。

kā：『給』。

九降風：東北季風。

### 之三 母語

細漢時陣  
M̄敢講話  
大漢了後  
一時 suah 講無話

這 má  
Beh 老 buē 老 ê 漚少年  
有話矣，suah 無底講  
有真濟真濟 ê 話  
M̄知 beh kā 啥人講  
嘛 m̄知 beh 對 toh 位 講起.....

你時常 khiā tī  
這塊島嶼烏暗 ê 路頭  
看著歷史 ê 雨  
一直落，一直落.....

阮深深知影你  
Teh 等家己 ê 性命  
漸漸 天光.....

啊！你是倒 tī 阮目墘  
Beh 焦 buē 焦 ê 目屎  
阿母 ê 話啊.....

**註解：**

這 má：『現在』。

漚（àu）：『差勁』、『身體不好』。

khia：倚，『站』。